

新編
樊山

批公判

讀精華

東溪州堂
原本

新編樊山批牘精華目錄

恩施增樊祥嘉父

卷三十三

批岐山縣趙令乃普稟

批韓城縣張令瑞璣稟

批韓城縣詞訟冊

批麟遊縣魏令立稟

批王令景峨稟

批韓城縣張令瑞璣稟

批南鄭縣詳

批略陽縣劉令賡年詞訟冊

批定遠廳汪丞時懋詞訟冊

批署乾州孔直牧稟

批雒南縣丁令禧瀚稟

批華州褚牧稟

批佛坪廳楊丞卓林稟

批盤屋縣廩生曹廷翰等稟詞

批屈令壽昌稟

批匿名控詞

批長武縣稟

批姚委員文蔚稟

批神葭釐局劉令汝訴稟

批定邊縣稟

批韓城縣詞訟冊

批醴泉縣周令稟

批醴泉縣周令稟

新編樊山批牘精華卷三十三目錄終

新編樊山批牘精華卷三十三

恩施樊增祥嘉父

批岐山縣趙令乃普稟

閱稟不勝憤咤。此次鐵路集款。本司思之數月。欲求輕而易舉。實於路工有濟。莫如移倉捐爲路捐。義倉積穀每畝三升之章程。是周觀察守同州時稟奉批准。奏明有案。令承上文而接續辦理。其勢甚順。其取甚廉。分之各屬。則於民無傷。合爲距款。則於事有濟。而且輸之義倉。有一往不返之形。歸之鐵路。是將本求利之事。倉捐數年一出。易不惟無利。而且有害。路捐按年而付息。不惟無害。而且有利。至於每畝三升。不過舉其大略。本司催科撫字。歷十五年。豈不知地有肥磽。糧有等則。近年各屬義倉積穀。皆隨糧則爲重輕。此次路捐。凡請隨糧折收者。無不立時批准。前者該令稟請。每糧一斗。令捐倉斗麥三升。若照下等下則之錫糧地計之。則一畝僅收數合耳。是一畝三升之章。業已十減七八。而本司深體民艱。立即照准。乃批牘未乾。後稟繼至。藉口於鳳翔辦法。彼輕此重。請再減半折收。計每糧一斗。僅能折收錢二十文。似此任意更張。視路章如兒戲。徵求已徧。集款無多。公司負息借之名。而鐵路無濟用。

之實。貽誤大局。舉由爾趙令一人發端。亦可謂胆大糊塗。輕心嘗試矣。夫岐山減至每斗三升。折錢八十。實已無可再減。再減則不如不捐矣。鳳翔來稟。未曾按糧核算。但云每年可收二萬數千金。該令前稟亦云。若照每斗三升計之。歲約二萬數千兩之譜。是鳳岐並無多寡之殊。如果鳳少於岐。亦只可加鳳翔之捐。而不當減岐山之額。本司批扶風譚令稟牘。已有成案在前矣。若各屬皆比其最少者。每况而愈下之勢。必所得無幾。此一款不足濟事。勢必官捐紳捐房捐鋪捐紛紛舉辦。各府廳州縣試思。從大處落墨。輕處下手之爲愈乎。抑盡提羣吏之私囊稅及商民之間架之爲得也。總之西潼鐵路。撫憲與本司俱勢成騎獸。凡爲僚屬。豈宜繫若連雞。若牽連不飛。將成笑柄。本司不任受也。且諸君子亦嘗聞蜀事乎。蜀自同治以來。丁糧已五倍加征。而鐵路開捐。又行拔穀之令。現在路款已積有四百萬金。秦之民純於蜀民。秦之吏何遽不如蜀吏乎。本司於此事。舌敝唇焦。筆枯腕脫。而該令首先與本司爲難。應卽撤任。以示立信之本。此後一畝三升之章。一體改爲按糧納捐。每斗捐麥三升。每升約折錢二十餘文。如各牧令有不願辦者。無妨稟請交卸。以免本司撤參。凜之此批。通飭各屬一體遵照。繳。

批韓城縣張令瑞璣稟

稟及表摺圖均閱悉。學堂之事。可與知者道。難與俗吏言。同寅中孰學孰不學。興辦學堂。某能辦。某不能辦。本司皆默識之。韓城王令。非不老成安靜。而於學堂事宜。則不知不能選擇。而使子固知韓原。學務必有起色。而欲爲前任糾謬補闕。自非變通舊日章程不可。該令首先變通教授管理章程。務令監學者各專責成。教士者各分門類。科學不素。鐘點無差。甲乙丙丁四班並授。而又附設勸學所。選派正紳十人。分鄉勸諭。並附設師範傳習所。多招中年寒士。造就師資。以備各鄉塾聘訂。法良意美。體格完全。教員薛孝廉。位本從前游藝學塾高足弟子。所編勸學問答。淺顯切要。足以抵排謬論。喚醒愚蒙。韓城有此官師。學堂風氣。何患不蒸蒸日上耶。應一切照准立案。稟批併登報。以資各屬矜式。表摺圖書併存。所謂書者。卽勸學問答也。應由學務處排印多本。以廣其傳。繳。

批韓城縣詞訟冊

各案皆簡潔了當。大凡有學問人。雖初任而卽能了事。若胸無墨水。雖服官數十年。歷任七八州縣。而冥頑如故。人安可以不讀書。繳。

批麟遊縣魏令立稟

據稟商民李映詳之妹。爲麟遊縣學官丁效儀繼室。光緒辛丑。憑扶風郝教官等爲媒。以禮聘娶。而效儀先已有妾薛氏。係原籍韓城縣優人之女。效儀嬖之。屢與李氏反目。薛氏欺其懦弱。竟敢以庶毆嫡。致令門斗出而勸解。迨癸卯鳳翔府考。八屬教官俱至郡城。映祥與原媒郝教官梁廷棟向效儀理論。效儀膽敢將廷棟送縣責押。因干衆怒。各教官公稟尹守。彼時卽欲揭參斷離。效儀情急哀求。懇與李氏製補褂一件。以正名分。並令薛氏與李氏叩頭服罪。事遂了結。及回縣盡昧前言。縱妾凌妻如故。該令到任後。丁李氏兩次奔縣哭訴。飢寒毆辱。情不能堪。該令意主調和。屢勸效儀弗聽。去臘李氏歸甯。一往不返。今年二月。映祥復來麟具控。意復求合。而效儀決計退婚。映祥亦以斷離爲請。該令以爲李氏未犯七出之條。而強合又有兩傷之勢。具稟請示前來。本藩司判曰。人無妾。可以續娶。有妾無寵。可以續娶。妾賢明知禮勸主翁續娶。可以續娶。效儀則三者俱無也。夫娼妓在室。而娶一好女入門。勢必以賤壓良。以鄭亂雅。郝教官與丁同寅。明知其家有野狐。而又爲別求鴛偶。昔人謂一部琵琶記。始終由張廣財多事。其郝教官之謂歟。李氏歸丁五年。捱無限之淒辛。受

無辜之楚。李之苦如道旁之李。丁之恨如眼中之丁。初公許於郡庭。再呼號於縣署。尹守嚴而仁者也。此等事苟可不離。決無斷離之理。明知丁之言不足信。又憫李之退無所歸。彼既知非。姑容悔過。今則業已大歸矣。出有七條。並無一條之可指。則罪不在李而在丁。離之兩好。出於兩姓之心甘。則斷離不由於本司而由於兩造。此後李氏願守願嫁。悉從其便。丁效儀不得異言。惟該教官覲然人師。玷污黷校。娶良家之女。大歸而璧已不完。近聖人之居。十年而臭猶不盡。今自知其暴行已著。衆論不容。乃借繼母之喪。作兔脫之計。此等敗類。應一面詳請咨革。一面札飭署韓城縣張令。刻日將丁效儀傳案。勒令出錢五百串。以助學堂經費。如敢抗違。卽將該革教鎖繫三年。罰做苦工。併將丁薛氏逮案。鞭背一百。枷號三月。認罰則免。否則遵批實行。蓋效儀捐實缺教官。買樂戶嫖女。而又敢於污辱良家。旋娶旋棄者。恃其有錢故也。天下錢奴。無不視錢如命。然鎖繫則痛切於身。薛氏則更甚於命。本司以人治人。屢試屢驗。今爲學堂薄添經費。爲李姓少雪沉冤。各該令當知此意也。繳。

批王令景峨稟

作短行而歌渭柳陽關。毋乃傷情。求長假而就吳萸玉局。猶難如願。諷尋來牘。意在

辭差。徒以棠棣連摧。遂欲梓桑遄返。足下文章有用。博識多通。依幕府之芙蓉。何其麗也。植縣庭之桃李。栽者培之。旣卸銅符。將迴蘭權。念在原之義。鵲鵲自切。歸飛而誦樹背之詩。萱草焉能忍置。夫點求俱逝。何允。僅孑然一身。自以經紀喪儀爲重。而嵩顗繼殂。周母惟恃此一子。似以不聞噩耗爲宜。若奉母旋歸。撫棺痛哭。親心傷矣。子舍安乎。爲足下計。輕裝旋楚。板輿留秦。給三月之假期。舉兩喪而並瘞。旣訖紅簫隴頭之事。速望白雲親舍而歸。公與私各不相妨。孝與友兩俱無憾。吾言盡此。賢者圖之。繳。

批韓城縣張令端璣稟

姦婦尙知羞愧。於兩雄妒姦。甲毆乙死之後。情知不能瞞人。甘心雉經而死。若移後挪前。此時羞惡之心。用於陳王兩人調姦之始。何難保名而全身。乃因其夫痰喘無用。久外不歸。始私陳姓。又私王姓。以致故雄甘心於新特。而卒自經以殉之。亦可謂不善用其羞惡者矣。各屬命案。強半因姦。姦案之多。大抵由於男不量力。女不安命。而鴉片一燈。實爲勾姦之媒。陝人老病失偶。率娶一寡婦爲伴。己爲已枯之樹。彼能不爲出牆之花。加以風俗淫偷。無論男女皆染嗜好。橫陳一榻。撲朔迷離。其形跡業

已共枕同牀。其究竟必至移船泊岸。向使老者病者不續娶。男子女人不吸煙。姦案決無如是之多也。移風易俗。是在良吏。戒煙斷癮。是在學堂。發其羞惡之心。而嚴其男女之別。吾中國聖人之教。所以不可一日廢也。此案陳添記狂淫奇妒。毆斃姦夫。傷斃姦婦。應重笞無算。然後照例辦案。仍候督撫憲暨臬司潼商道批示。繳。

批洛陽縣劉令賡年詞訟冊

懲治惡人甚痛快。處分家事甚周到。有此斷才。可以爲民父母。繳。

批南鄭縣詳

糊塗案件。糊塗了結。吾不欲置一詞。繳。

批定遠廳汪丞時愨詞訟冊

該令樸實廉勤。久爲本司倚信。故於墨經之中。猶以鹽卡畀之。及服闋應歸山西候補。又復羅致來秦。誠以人才難得。秦之良。不當爲晉之用也。論其實心實政。公生明。明生斷。事不足奇。及觀此冊。臚列四案。公允固不待言。而撰敘詳雅。出以駢儷。事理曲盡。文采斐然。是軒鶴之清。而益以威鳳之采也。能不佩服。弟一案登報。繳。

批署乾州孔直牧稟

巡警不僅衛商。然果使巡防有效。則商民首受其福。故各州縣欲籌警費。不能不借助商民。特爲政在人。取之而善用之。而實則款集而商不怨。取之而不善用之而不實。則聚斂無幾。而怨謗繁興。該牧勤政愛民。遇事皆有斟酌。據稟該州鋪戶分爲五等。按日輸捐。並於四街各舉頭等商號數家。經手收捐。五日一輪。俾均勞逸。錢存里局。始終不經書役之手。約計滿年可收一千五百餘串。是籌款先已得法矣。至開辦警務。先募壯兵四十名。交城守千總管帶。而又選優等師範生爲教習。授之警察講義錄。並教體操。一月以後。汰劣留良。再行酌定月餉。分班上段。教之而後用之。使皆明於警察之大旨。乃能收巡緝之實功。其辦事既有條理。又有步驟。深堪嘉悅。至開辦伊始。衣械路燈之屬。在在需錢。卽以首月捐款。作爲開辦經費。尤爲得法。應一切照准立案。並將來稟登報。以備各屬仿照施行。仍候督撫憲暨鹽法道臬司警務局批示。繳。

批維南縣丁令禧瀚稟

據稟母病纏綿。懇祈終養。孝子之心。能不體貼。惟養爲老親所樂就。而終非人子所忍言。雖李密昔有是言。而純廟垂爲大戒。應俟稟商撫憲。委員接署維南縣篆。俾

得經營藥餌。料理滑甘。所冀白雲不移。春暉永駐。聽謳歌而色喜。觀善政而加餐。雨露自天。長培堂北。忘憂之草。春風在手。仍種河陽。稱意之花。藍田一缺。甫經准補。未便遽開。勿言進退有餘。當思君親兩報也。繳。

批華州褚牧稟

該牧夙承家學。尤諳新理。中西兼總。成俗化民。吾陝興辦學堂。真知教育之指者。吾心藏寫。不過十人。而該牧卽其一也。曩在耀特斗大一州耳。而釀金開學。規畫井然。及蒞華州。益以學務爲重。經年措置。甫得觀成。茲據稟陳一切建築形式。辦理章程。常年經費。並請定名曰中學堂等情。前來。其經畫詳密。悉與奏定章程相合。自應一併照准立案。惟旣名曰中學堂。而目前科學。仍是小學堂程度。事固不可速成。然亦必須日求進步。名實相副。斯爲得之。建築頗具苦心。就圖續觀之。微嫌閱報室稍遠。而右廂前後兩講堂之間。插入一排齋舍。遂使講堂二座。中隔一層齋舍。五排分爲兩處。於鄙心殊未愜耳。加高程度。自籌添經費始。尙其畢力圖之。仍候督撫憲暨學務處批示。繳。二圖一摺併存。

批佛坪廳楊丞卓林稟

該廳於六月初八日。蛟水斗發。淹斃男婦大小二十餘名。口民田被浸成災者五六成七八成不等。積今兩月有餘。該丞無隻字稟報。茲於八月初三日。稟陳籌辦巡警事宜。但稱集款之難。若無被災之事也者。亦可謂毫無心肝矣。現據漢中府轉據馮巡檢稟詞。以該丞玩視民瘼。稟計到司。已委劉丞署理斯缺。究竟該廳災狀。該丞是否聞知。知其成災。何以不稟。如其無災。該巡檢何能憑空捏造。仰明白稟覆候奪。仍候撫憲並警務局批示。繳。

批整屋縣廩生曹廷翰等稟詞

大凡客將去。則主人留之。官將去。則紳民留之。若本未嘗去。則何所用其留。爾等見整屋改委何人乎。所稟殊屬冒昧。

批屈令壽昌稟

來稟於查訊此案情形。委曲詳盡。處處尋出根據。而魏玉龍之冤抑。不辯自明。查案所以貴老手也。此案前據武功高令錫華詳稱。該縣張順興鋪內。於四月初三夜。被賊竊去銀兩煙土。旋即緝獲竊賊張根記到案。越日又據緝役拏獲魏玉龍到案。並於黃中未及土妓紅花家中。起獲贓銀十五兩。高令遂以爲贓真賊確。通詳擬辦。旋

據玉龍之父魏成金上控撫轅。批飭該令確查會審。茲據該令查明訊實。縷晰具稟。請示前來。查魏玉龍家本素封。近來中落。以痘科自給。因聘繼妻。財禮無出。向其姊夫劉鈞借衣三件。當銀五兩。寄存黃中未家。旋被武功緝役撞遇。捉付差頭玉彪吊拷。誣伏。王彪言於高令。提案究問。玉龍稱冤。高令當令雜立衆中。使張根記指認。而根記一見。卽能指出。遂以爲眞賊無疑。惟此案贓銀四十兩。而玉龍僅有銀五兩。贓不齊。則案仍不圓。刑求之下。玉龍妄指紅花。高令移請咸陽黃令起贓。及紅花夫婦到堂。供無其事。黃令斷令變賣衣物。得十金。交武差持回。於是高令此案男盜女娼。一齊冤沉海底矣。查張根記到案之初。但稱有夥賊金七。魏姓。並不知玉龍之名。及令當堂辨認。開口卽曰。此人是魏玉龍。使高令稍有明機。應知犴繫之時。早受猛升之教。乃反自鳴得意。以爲出此奇計。遂使賊無遁形。不知張魏均隸於王彪。該蠹役既誣良。拷逼於先。豈不令張根記指認於後。高令於差役倚其人不啻腹心。信其言過於枕席。武功之民。尙得見天日乎。今幸該令不辭勞瘁。先至咸陽底王村。查得魏玉龍實係良民。再至興平固賢村。訪劉鈞於病榻。既得其實。復至當衣之典肆。兌銀之錢店。查得衣三件。銀五兩。一一皆眞。並於此案之外。訛傳玉龍有偷馬之事。亦皆

訪詢得實。事事屬虛。玉龍於是始得撥雲霧而見青天矣。案經該令訊明。張根記供稱與魏玉龍實不相識。全係王彪喉令誣扳。當將玉龍卸去鎖鑰。原銀五兩。及醫書刀針等件。一併給還。咸陽僞造贓銀十兩。仍移還黃令轉付紅花。辦理雖不愜吾心。尙下得去。其差役王德黃彥妄拏無辜。總役王彪串害誣良。詐贓入己。稟請從重懲辦。夫竊案何縣蔑有。若有一竊案。卽執途人而拖入班廳。恣意拷掠。高坐堂皇者。亦不問來由。唯差言是聽。行路者人人自危矣。高令此案既有特別之惡差。非賊而以爲是賊。更得倒煤之妓女。無贓而勒令賠贓。案由湊合而成。官則糊塗已極。王彪不死。何以服民。高錫華不撤。何以馭吏。查黃中未受寄之銀。四月十二日。已被王彪詐去。六月底高令傳中未追贓。始由王彪交出。夫銀在差手。兩月不交。交出又非原銀。高令竟一無所問。其視差役。蓋家庭尊長之不啻也。王彪著鎖押來省。盡法懲辦。王德黃彥永遠鎖繫。高令業已撤任。應否參革。俟會同臬司稟商撫憲再奪。咸陽黃令本應詳記大過。念其在水利局學務處深著賢勞。特予寬免。該令平反冤獄。應詳記三大功。以示鼓勵。仍候撫憲暨臬司批示。繳。

此稟自稱紳耆鄉民。具控鬱莊守備趙雲彪。把總吳士魁前來。控人無姓無名。直與匿名揭帖無異。而且竟用馬封馳遞。印文模糊。不辨其爲何人。鈐記。然觀其硃墨標填之處。全合款式。決非鄉間鄙野紳衿所能爲。豈該縣巡檢典史輩。與武營不和。作此狡獪耶。營中千把本多不堪之輩。而此稟所言則斷不足信。且斷不必查。蓋據此行查。則匿名告訐之刁風。將日增月盛矣。匿名之人。敢於朦用馬封。並敢於通稟撫憲。實屬膽妄已極。仰維南縣丁署令。嚴密查究此件。係何人印信。並調查驛書號簿。從何處交來。務將主名飛速稟覆聽究。至趙守備吳把總平日有何劣跡。同寅是否協和。地方有無怨謗。丁令在維逾年。可以不問而知。亦卽據實稟復。稟及印封併發。仍繳。

批長武縣稟

州縣之病有二。一則畏事而不肯做。一則喜事而不能成。庸人畏事不足論。稍有才者必喜事。到任不久。卽上稟牘。侈言某利當興。某弊當革。以圖討好。而上司見屬員肯辦事。未有不嘉許者。卒之紙上談兵。空言無實。及署事年滿。其人已去。其事亦無成。若此等輩。吾見亦多矣。該署令自到長武。百廢俱興。前者稟開紡織一事。言之成

理井井有條。本司知其必成。是以發欵助之。茲據縷晰稟陳。並資呈布樣一疋前來。計本年二月起。八箇月中。該令費心無算。乃得女工日有起色。所擬區分四班。擇尤給獎。均極允當。又因女工已具規模。欲推廣男工。以興工藝。亦已延定工師。剋期開辦。並劃清界限。女工藝歸紳經理。男工藝歸商主辦。而官從中主持之。所籌均極有道理。應卽如所擬行。惟念長武瘠區。該令竭心力以爲民。而不得餘粟帛以自贍。優賢酬功之謂何。是則本司之責矣。布疋閱過甚好。仍以發還。仍候督撫憲批示。繳清摺存。

批姚委員文蔚稟

該令心細才優。查詢此案。瞭如指掌。此次耀州生員左秉鑑等。上控劉牧一案。明係有人暗中指喉。借快私嫌。所列各款。一無實據。始由學堂爭席而起。遂有暗中作祟之謀。鬼蜮情形。早已洞悉。所以必須委查者。事非水落石出。不足關其口而服其心也。茲既查明所控多誣。應如來稟一概勿庸置議。其學堂規則。應添應改之處。一切如所擬行。左秉鑑係一煙鬼。任靈秀以門生誣控其師。耀華二州屢被驅逐。蓋尤無恥而大不安分者。仰劉牧卽將左任兩生查取年貌。具詳斥革。以端士習。並使喉獎。